

## **Slijedimo Poslanika a.s. da bi nas Allah zavolio!**

Draga i mnogo poštovana braćo!

Danas je petak “povećani dan” kako je za petak rekao Allahov Poslanik a.s., i danas je 11. rebiul-evvel, hidžretske 1436. godine. Još samo jedan dan nas dijeli od Poslanikovog a.s. Dana rođenja 12. rebiul-evvela koji dan nam je i nametnuo temu današnjoj hutbi. Danas je i prva džuma, 02. januara, po Isau a.s.2015. godine.

U 31. ajeti kerimu sure Alu-Imran Allah dž.š. kaže: **“Kul in kuntum tuhibbunellahe...” – “Reci! Ako vi Allaha volite, onda mene slijedite, i vas će Allah voljeti i grijehe vam oprostiti! A Allah prašta i milostiv je!”**

*Slijediti Poslanika a.s. nije samo puko oponašanje nekoga, niti je to kratko, prolazno, euforično stanje. To mora biti slijedenje u kojem se osjeća potpuno pouzdanje u Poslanika a.s., konstantnost i istrajnost sa tendencijom stalnog povećanja u obimu, nepokolebljivost i osjećanje radosti u tome da se korača Poslanikovom a.s. stazom. Ovo povjerenje vjernici će također pokloniti i pravovjernim halifama ummeta: Ebu Bekru, Omeru, Osmanu i Aliji, – radijellahu anhum – neka je na njih Allahovo zadovoljstvo. Evo šta o ovome kaže Poslanik a.s.: “Strogo se držite moga sunneta kao i sunneta pravovjerno upućenih halifa nakon mene!” (Ebu Davud, Tirmizi, Ibnu Madže)*

Jedan od učenjaka i dubokih pobožnjaka iz prvih generacija u islamu vodio je interesantan razgovor sa svojim sinčićem koji je kroz stoljeća ostao zabilježen i do nas došao. Obratio se dječaku sa ovim riječima:

– Sine, kada porasteš na koga bi volio da ličiš?

– Pa babo, zna se: na tebe! O tebi svi govore da si najučeniji, najpobožniji i da si najljepšeg vladanja i ponašanja!

– E vidiš sine moj. Ja sam postao ovakav jer sam se ugledao na Poslanika a.s., pa potom na Ebu Bekra, Omera, Osmana i Aliju r.a.

– Ti, sine moj, ako se budeš ugledao samo na mene nećeš postići onu potrebnu visinu. Zato se ugledaj na one najbolje da bi postao velik, ugledan i dostojanstven čovjek!

Allahov Poslanik a.s. svojim držanjem i ponašanjem, ophođenjem sa ljudima, svojom urednošću, tačnošću, istinoljubivošću odavao je već od djetinjstva posebnog čovjeka vrijednog pažnje i divljenja. Predislamski sugrađani bili su mu dali častan nadimak El-Emin – Vjerni, Pouzdani. Ono što je bio rekao drugovima svojim o pravom vjerovanju u potpunosti je podržavao. Na upit o savršenom vjerovanju on se ovako izrazio: “Savršena vjera – iman odražava se kod čovjeka u lijepom moralu!”

Prikazujući njegov moral – ahlak (od riječi “huluk” koja označava unutarnji izgled čovjeka) Imam Gazali ovakvim ga u suodnošenju sa ljudima predstavlja: “Bio je neobično ljubazan i svojim izrazom lica svakom bi u njegovoj blizini poklonio dužnu pažnju pa su ljudi dobijali utisak da u tom času niko nije dostojanstveniji i vrijedniji do on lično! Pokazivao bi on to načinom skromnog sjedenja, gledanjem u sugovornika i pažljivim slušanjem, zatim njegovim

*načinom govorenja punim lijepih dosjetki, i poklonjenom im ljubaznošću. Nije bilo susreta sa njime a da to nije bilo ulivanje moralnosti i poniznosti, povjerenja i sigurnosti. Nije se lahko ljutio i brzo i rado bi davao svoj pristanak na lijepe prijedloge.”*

*Ličnost, kakva je bila naš Poslanik a.s. osvajao je u prošlosti i jednako danas osvaja srca ljudi. Za sve objektivne ljude u svijetu on je neprikosoven vođa i autoritet. Jules Masserman, psihoanalitičar, savremeni američki profesor sa Čikaškog Univerziteta promatra Poslanika a.s. sa tačke vođstva i zaključuje da je upravo on Muhammed a.s. “vođa svih vremena” jer posjedovao je istovremeno tri združene funkcije: Poklonio je ljudima oblik vjere;*

*– Pobrinuo se za dobrobit svih koje je vodio; i*

*– Osigurao je društveni sistem u kojem se ljudi osjećaju relativno sigurnima.*

*Međutim, za nas muslimane on ne smije biti tek osobom poštovanja, divljenja i poklonjene mu ljubavi. Malo je i nedostavno iskazati poštovanje, divljenje i ljubav. Od nas se traži mnogo više, a to je biti njegov sljedbenik i time izmamiti ljubav za sebe, jer nije najbitnije da voliš nego slijeđenjem da voljen postaneš i to voljen od samoga Allaha koji te zbog ljubavi i slijeđenja Njegovog Poslanika a.s. nagrađuje Svojom ljubavi, a potom i oprostom!*

*Stoga, draga i cijenjena braćo!, krenimo već sada stopama Poslanika a.s. da bi nas Allah zavolio i grijehe nam oprostio!*

*Ishak Alešević, imam*